

Melayu berpecah kerana berbeza fahaman politik
Utusan Online
December 18, 2011

TASEK GELUGOR 17 Dis. - Bekas Perdana Menteri, Tun Dr. Mahathir Mohamad sedih kerana orang Melayu terus berpecah akibat berbeza fahaman politik.

Menurutnya, perkara itu tidak sepatutnya berlaku kerana orang Islam di negara ini mengikut fahaman yang sama iaitu Ahli Sunnah Wal Jamaah.

Jelas beliau, berbeza dengan negara-negara lain terutama di Asia Barat, orang Islam di sana mengamalkan fahaman berbeza seperti Syiah.

"Kita semua beriman kepada Imam Shafie, tidak patut ada perpecahan. Tapi kita berpecah bukan kerana agama sebaliknya fahaman politik.

"Politik ini bila digunakan dalam agama, maka timbul bermacam-macam perbuatan bercanggah dengan ajaran Islam termasuk sembahyang dua imam, tidak boleh tanam satu kubur, kahwin dengan orang ini atau itu tidak boleh.

"Sepatutnya orang Islam bersatu-padu. Politik sebegini merugikan orang Melayu," katanya yang juga Yang Dipertua Pertubuhan Kebajikan Islam Malaysia (Perkim).

Beliau berkata demikian kepada pemberita selepas majlis Multaqa Wedatul Ummah Ketiga anjuran Persatuan Kariah-Kariah Masjid Negeri Pulau Pinang di sini hari ini.

Hadir sama Menteri di Jabatan Perdana Menteri, Tan Sri Nor Mohamed Yakcop dan Yang Dipertua Persatuan Kariah-Kariah Masjid Negeri Pulau Pinang, Datuk Seri Mohd. Yussof Latiff.

Dr. Mahathir menambah, keadaan itu menyebabkan orang Melayu kini menjadi kaum minoriti di bumi sendiri berikutan telah terbahagi kepada tiga kumpulan mengikut parti masing-masing iaitu UMNO, Pas dan Parti Keadilan Rakyat (PKR).

Akibatnya, jelas beliau, orang Melayu terpaksa meminta belas ihsan daripada parti lain yang dikuasai bukan Islam untuk menang pilihan raya.

"Semasa zaman pemerintahan British dulu, orang Melayu bersatu dalam UMNO menentang Malayan Union hingga negara merdeka.

"Namun, sekarang kita berlawan sesama sendiri," ujarnya

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2011&dt=1218&pub=Utusan_Malaysia&sec=Politik&pg=po_03.htm